

16 JUN 2000

G15-Syed Hamid

MALAYSIA YAKIN PERSIDANGAN DI KAHERAH AKAN TINGKAT KERJASAMA G15

Oleh: Ahmad Zukiman Zain

KAHERAH, 16 Jun (Bernama) -- Malaysia yakin Persidangan Kemuncak Kumpulan 15 Negara Membangun (G15) yang bermula Isnin depan akan mengukuhkan kerjasama negara-negara Selatan dalam menghadapi isu-isu antarabangsa.

Menteri Luar Datuk Seri Syed Hamid Albar berkata kehadiran ramai ketua negara dan kerajaan ke persidangan kali ini memberikan gambaran positif untuk memberi fokus kepada isu-isu yang menyentuh kepentingan bersama.

"Saya fikir persidangan kemuncak kali ini yang akan dihadiri oleh sembilan ketua negara dan kerajaan serta empat timbalan ketua negara dan kerajaan adalah perkembangan yang baik.

"Ini bermakna 13 daripada 17 anggota kumpulan akan diwakili pada peringkat tinggi," katanya kepada wartawan Malaysia setibanya di sini menjelang persidangan kemuncak itu.

Syed Hamid dan rakan-rakan sejawatannya dalam G15 akan mengadakan mesyuarat esok sebagai persediaan kepada persidangan kemuncak itu.

Perdana Menteri Datuk Seri Dr Mahathir Mohamad dijadualkan tiba di sini esok untuk persidangan kemuncak yang merupakan kali kedua dianjurkan oleh Mesir.

Kaherah, yang merupakan bandar raya terbesar di Afrika, pertama kali menjadi tuan rumah persidangan itu pada tahun 1998.

Syed Hamid berkata G15 perlu mempunyai wibawa pada peringkat antarabangsa agar pandangannya diambil kira dalam isu-isu seperti globalisasi, ekonomi dan perdagangan.

"Perdana Menteri kita memberi perhatian kepada G15 dan sentiasa menghadiri persidangan kemuncak kumpulan ini sebagai komitmennya terhadap kerjasama Selatan," katanya.

Beliau berkata Malaysia akan menyokong permohonan Iran untuk menyertai G15, yang pertama kali mengadakan persidangan kemuncaknya di Kuala Lumpur pada tahun 1991.

Permohonan Iran akan dibincangkan pada peringkat pegawai sebelum direkomenkan kepada para pemimpin yang mengadakan persidangan kemuncak selama dua hari.

G15 kini dianggotai Algeria, Argentina, Brazil, Chile, Mesir, India, Indonesia, Jamaica, Kenya, Malaysia, Mexico, Nigeria, Peru, Senegal, Sri Lanka, Venezuela dan Zimbabwe.

Syed Hamid berkata setelah 10 tahun, adalah wajar bagi G15 meneliti segala pencapaiannya dalam meningkatkan kerjasama terutama dalam bidang ekonomi dan perdagangan.

Beliau yakin pernyataan bersama merangkumi soal-soal politik, ekonomi dan perdagangan yang akan dikeluarkan pada akhir persidangan kemuncak itu dapat meningkatkan kesepaduan kumpulan tersebut.

-- BERNAMA

AZZ NMO